



**Sud Bosne i Hercegovine**  
**Sud Bosne i Hecegovine**

---

**Broj: S1 3 Iž 043719 22 Iž**  
**Sarajevo, 18.08.2022.godine**

*Sud Bosne i Hercegovine, u vijeću Apelacionog odijeljenja sastavljenom od sudija Dinke Bešlagić Čovrk kao predsjednika vijeća, Vesne Trifunović i Zvezdane Antonović kao članova vijeća, odlučujući o žalbi Dragomira Lukića sa boravkom u ..., izjavljenoj protiv Odluke Centralne izborne komisije Bosne i Hercegovine broj: 06-1-07-1-608-3/22 od 04.08.2022.godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Opšte izbore 2022.godine, u nejavnoj sjednici, održanoj dana 18.08.2022.godine, donio je*

**R J E Š E N J E**

*Žalba se odbija.*

**O b r a z l o Ź e n j e**

*Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine po podnesenim prijavama do 19.07.2022. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelja odbijen je upis iz razloga što uz prijavu nije dostavljen validan dokaz o tačnoj adresi u inostranstvu.*

*Žalitelj je protiv navedene odluke blagovremeno izjavio žalbu u kojoj ističe da je u prijavnom obrascu naveo adresu Filipa Višnjića 2, Novi Sad, na koju želi da mu se dostave glasački listići, obzirom da nije u mogućnosti da glasa u Loparama gdje ima prebivalište jer se nalazi na privremenom radu u Srbiji. Predlaže da se žalba usvoji i da mu se omogući glasanje izvan BiH.*

*Centralna izborna komisija Bosne i Hercegovine u odgovoru na žalbu predlaže da se žalba odbije kao neosnovana.*

*Žalba nije osnovana.*

*Prema stanju u spisu ovo vijeće konstatuje da je Centralna izborna komisija BiH, prije donošenja ožalbene odluke, a prilikom razmatranja prijave za glasanje izvan BiH žalitelja, dostavljene dana 21.06.2022.godine elektronskim putem, u skladu sa Upustom o postupku slanja, prijema, obrade, arhiviranja i zaštite elektronskih prijava državljana BiH za glasanje izvan BiH elektronskim putem (Sl.glasnik BiH broj 27/22), utvrdila da žalitelj nije dostavio validan dokaz o adresi boravišta u inostranstvu.*

*Odredba člana 3.15 stav (1) Izbornog zakona BiH propisuje da državljanin BiH koji privremeno živi u inostranstvu, a ima biračko pravo u skladu sa Zakonom i koji je upisan u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je da za svake izbore podnese prijavu Centralnoj izbornoj komisiji BiH. Prijava mora biti zaprimljena u Centralnu izbornu komisiju BiH prije roka koji odredi Centralna izborna komisija BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.*

*Naime, na dostavljenom uvjerenju o prebivalištu, nema imena potpisnika uvjerenja, već samo stoji „zamenik načelnika“, dok je pečat nečitak i nepravilnog oblika, što u sumnju dovodi vjerodostojnost predmetnog dokumenta, kako je to pravilno utvrdila Centralna izborna komisija BiH.*

*Također, nakon obrade prijave, žalitelj je putem e-maila dana 27.07.2022.godine obaviješten da njegova prijava za glasanje izvan BiH sadrži nedostatke. Nevedene nedostatke žalitelj nije otklonio u predviđenom roku od dva dana od dana prijema obavijesti, a navedeni rok je prekluzivan i ne može se produžavati, pa je pravilna odluka CIK da se imenovanom ne dozvoli upis u Izvod iz Centralnog biračkog spiska za glasanje van BiH.*

*Napomene radi, žalitelju nije oduzeto biračko pravo za Opće izbore 2022. godine, nego samo mogućnost glasanja putem pošte izvan BiH, jer imenovani može glasati na redovnom biračkom mjestu u općini u kojoj ima prijavljeno prebivalište u BiH.*

*S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.*

***Predsjednik Vijeća  
Sudija  
Dinka Bešlić Čovrk***